

# 王守仁全集

## 簡 介

(1472~1528) 字伯安，浙江餘姚人。明代大儒，弘治進士。正德時巡撫南贛，定宸濠之亂。嘉靖時封新建伯，總督兩廣，破斷藤峽賊，卒諡文成。其學以知行合一為主，發揮致良知之教，反對朱熹格物窮理之說，講心學淵源於宋之陸九淵，世稱姚江學派。嘗築室於陽明洞，學者稱陽明先生，有王文成公全書。

## 遊牛峰寺四首

洞門春靄蔽深松，飛磴纏空轉石峰。猛虎踞崖如出柙，此山殊不厭來重。  
縈紆鳥道入雲松，下數湖南百二峰。岩犬吠人時出樹，山僧迎客自鳴鐘。  
凌飆陟險真扶病，異日探奇是舊蹤。欲扣靈關問丹訣，春風蘿薜隔重重。

偶尋春寺入層峰，曾到渾疑是夢中。飛鳥去邊懸棧道，馮夷宿處有幽宮。  
溪雲晚度千岩雨，海月涼飄萬裏風。夜擁蒼崖臥丹洞，山中亦自有王公。  
一臥禪房隔歲心，五峰煙月聽猿吟。飛湍映樹懸蒼玉，香粉吹香落細金。  
翠壁年多霜蘚合，石床春盡雨花深。勝遊過眼俱陳跡，珍重新題滿竹林。

## 姑蘇吳氏海天樓次鄺尹韻

晴雪吹寒春事濃，江樓三月尚殘冬。青山暗逐迴廊轉，碧海真成捷徑通。  
風暖簷牙雙燕劇，雲深簾幕萬花重。倚蘭天北疑回首，想像丹梯下六龍。

## 尋春

十里湖光放小舟，謾尋春事及西疇。江鷗意到忽飛去，野老情深只自留。  
日暮草香含雨氣，九峰晴色散溪流。吾儕是處皆行樂，何必蘭亭說舊遊？

## 天涯

天涯歲暮冰霜結，永巷人稀罔象遊。長夜星辰瞻閣道，曉天鐘鼓隔雲樓。  
思家有淚仍多病，報主無能合遠投。留得升平雙眼在，且應蓑笠臥滄洲。

## 歲暮

兀坐經旬成木石，忽驚歲暮還思鄉。高簷白日不到地，深夜黠鼠時登床。  
峰頭霽雪開草閣，瀑下古鬆閒石房。溪鶴洞猿爾無恙，春江歸棹吾相將。

## 因雨和杜韻

晚堂疏雨暗柴門，忽入殘荷瀉石盆。萬裏滄江生白髮，幾人燈火坐黃昏？  
客途最覺秋先到，荒徑惟憐菊尚存。卻憶故園耕釣處，短蓑長笛下江村。

赴謫次北新關喜見諸弟

扁舟風雨泊江關，兄弟相看夢寐間。已分天涯成死別，寧知意外得生還！  
投荒自識君恩遠，多病心便吏事閒。攜汝耕樵應有日，好移茅屋傍雲山。

南屏

溪風漠漠南屏路，春服初成病眼開。花竹日新僧已老，湖山如舊我重來。  
層樓雨急青林迴，古殿雲晴碧嶂回。獨有幽禽解相信，雙飛時下讀書臺。

臥病靜慈寫懷

臥病空山春復夏，山中幽事最能知。雨晴階下泉聲急，夜靜松間月色遲。  
把卷有時眠白石。解纓隨意濯清漪。吳山越嶠俱堪老，正奈燕雲繫遠思！

移居勝果寺二首

江上俱知山色好，峰回始見寺門開。半空虛閣有雲住，六月深松無暑來。  
病肺正思移枕簟，洗心兼得遠塵埃。富春咫尺煙濤外，時倚層霞望釣臺。  
病餘岩閣坐朝曛，異景相新得未聞。日腳倒明千頃霧，雨聲高度萬峰雲。  
越山陣水當吳嶠，江月隨潮上海門。便欲攜書從此老，不教猿鶴更移文。

憶別

憶別江幹風雪陰，艱難歲月兩侵尋。重看骨肉情何限，況復斯文約舊深。  
賢聖可期先立志，塵凡未脫謾言心。移家便住煙霞壑，綠水青山長對吟。

泛海

險夷原不滯胸中，何異浮雲過太空！夜靜海濤三萬裏，月明飛錫下天風。

武夷次壁間韻

肩輿飛度萬峰雲，回首滄波月下聞。海上真為滄水使，山中又遇武夷君。  
溪流九曲初諳路，精舍千年始及門。歸去高堂慰垂白，細探更擬在春分。

草萍驛次林見素韻奉寄

山行風雪瘦能當，會喜江花照野航。本與宦途成懶散，頗因詩景受閒忙。  
鄉心草色春同遠，客鬢松梢晚更蒼，料得煙霞終有分，未須連夜夢溪堂。

玉山東嶽廟遇舊識嚴星士

憶昨東歸亭下路，數峰簫管隔秋雲。肩輿欲到妨多事，鼓枻重來會有雲。  
春夜絕憐燈節近，溪聲最好月中聞。行藏無用君平蔔，請看沙邊鷗鷺群。

### 廣信元夕蔣太守舟中夜話

樓台燈火水西東，簫鼓星橋渡碧空。何處忽談塵世外？百年惟此月明中。  
客途孤寂渾常事，遠地相求見古風。別後新詩如不惜，衡南今亦有飛鴻。

### 夜泊石亭寺用韻呈陳婁諸公因寄儲柴墟都憲及喬白岩太常諸友

廿年不到石亭寺，惟有西山只舊青。白拂掛牆僧已去，紅蘭照水客重經。  
沙村遠樹凝春望，江雨孤篷入夜聽。何處故人還笑語？東風啼鳥夢初醒。  
悵望沙頭成久坐，江洲春樹何青青。煙霞故國虛夢想，風雨客途真慣經！  
白壁屢投終自信，朱絃一絕好誰聽？扁舟心事滄浪舊，從與漁人笑獨醒。

### 夜宿宣風館

山石崎嶇古轍痕，沙溪馬渡水猶渾。夕陽歸鳥投深麓，煙火行人望遠村。  
天際浮雲生白髮，林間孤月坐黃昏。越南冀北俱千里，正恐春愁入夜魂。

### 萍鄉道中謁濂溪祠

木偶相沿恐未真，清輝亦復凜衣巾。簿書曾厲乘田吏，俎豆猶存畏壘民。  
碧水蒼山俱過化，光風霽月自傳神。千年私淑心喪後，下拜春祠薦渚蘋。

### 宿萍鄉武雲觀

曉行山徑樹高低，雨後春泥沒馬蹄。翠色絕雲開遠嶂，寒聲隔竹隱晴溪。  
已聞南去艱舟楫，漫憶東歸沮杖藜。夜宿仙家見明月，清光還似鑑湖西。

### 醴陵道中風雨夜宿泗州寺次韻

風雨偏從險道嘗，深泥沒馬陷車箱。虛傳鳥路通巴蜀，豈必羊腸在太行！  
遠渡漸看連暝色，晚霞會喜見朝陽。水南昏黑投僧寺，還理義編坐夜長。

### 羅舊驛

客行日日萬峰頭，山水南來亦勝遊。市穀烏啼村雨暗，刺桐花暝石溪幽。  
蠻煙喜過青楊瘴，鄉思愁經芳杜洲。身在夜郎家萬裏，五雲天北是神州。

### 沅水驛

辰陽南望接沅州，碧樹林中古驛樓。遠各日憐風土異，人間隨地可淹留。

### 鐘鼓洞

見說水南多異跡，岩頭時有鼓鐘聲。空遺石壁千年在，未信金沙九轉成。  
遠地星辰瞻北極，春山明月坐更深。年來夷險還忘卻，始信羊腸路亦平。

### 平溪館次王文濟韻

山城寥落閉黃昏，燈火人家隔水村。清世獨便吾職易，窮途還賴此心存。

蠻煙瘴霧承相往，翠壁丹崖好共論。畎畝投閒終有日，小臣何以答君恩？

#### 清平衛即事

積雨山途喜乍晴，暖雲浮動水花明。故園日與青春遠，敝縕涼思白苧輕。  
煙際卉衣窺絕棧，峰頭戍角隱孤城。華夷節制嚴冠履，漫說殊方列省卿。

#### 興隆衛書壁

山城高下見樓台，野戍參差暮角摧。貴竹路從峰頂入，夜郎人自日邊來。  
鶯花夾道驚春老，雉堞連雲向晚開。尺素屢題還屢擲，衡南那有雁飛回？

#### 七盤

鳥道縈紆下七盤，古藤蒼木峽聲寒。境多奇絕非吾土，時可淹留是謫官。  
猶記邊峰傳羽檄，近聞苗俗化衣冠。投簪實有居夷志，垂白難承菽水歡。

#### 龍岡漫興五首

投荒萬裏入炎州，卻喜官卑得自由。心在夷居何有陋？身雖吏隱未忘憂。  
春山卉服時相問，雪塞藍與每獨遊。擬把犁鋤從許子，謾將絃誦止言遊。  
旅況蕭條寄草堂，虛簷落日自生涼。芳春已共煙花盡，孟夏俄驚草木長。

絕壁千尋凌杳靄，深岩六月宿冰霜。人間不有宣尼叟，誰信申韓未是剛？  
路僻官卑病益閒，空林惟聽鳥間關。地無醫藥憑書卷，身處蠻夷亦故山。  
用世謾懷伊尹心，思家獨切老萊斑。夢魂兼喜無餘事，只在耶溪舜水灣。

臥龍一去忘訊息，千古龍岡漫有名。草屋何人方管樂，桑間無耳聽咸英。  
江沙漠漠遺雲鳥，草木蕭蕭動甲兵。好共鹿門龐處士，相期採藥入青冥。  
歸與吾道在滄浪，顏氏何曾擊柝忙？枉尺已非賢者事，斬輪徒有古人方。  
白雲晚憶歸岩洞，蒼蘚春應遍石床。寄語峰頭雙白鶴，野夫終不久龍場。

#### 答毛拙庵見招書院

野夫病臥成疏懶，書卷長拋舊學荒。豈有威儀堪法象？實慚文檄過稱揚。  
移居正擬投醫肆，虛席仍煩避講堂。範我定應無所獲，空令多士笑王良。

#### 老檜

老檜斜生古驛傍，客來繫馬解衣裳。託根非所還憐汝，直幹不撓終異常。  
風雪凜然存節概，刮摩聊爾見文章。何當移植山林下，偃蹇從渠拂漢蒼。

#### 卻巫

臥病空山無藥石，相傳土俗事神巫。吾行久矣將焉禱？眾議紛然反見迂。

積習片言容未解，輿情三月或應孚。也知伯有能為厲，自笑孫僑非丈夫。

### 過天生橋

水光如練落長松，雲際天橋隱白虹。遼鶴不來華表爛，仙人一去石橋空。  
徒聞鵲駕橫秋夕，謾說秦鞭到海東。移放長江還濟險，可憐虛卻萬山中。

### 南霽雲祠

死矣中丞莫謾疑，孤城援絕久知危。賀蘭未滅空遺恨，南八如生定有為。  
風雨長廊嘶鐵馬，松杉陰霧卷靈旗。英魂千載知何處？歲歲邊人賽旅祠。

### 春晴

林下春晴風漸和，高岩殘雪已無多。遊絲冉冉花枝靜，青壁迢迢白鳥過。  
忽向山中懷舊侶，幾從洞口夢煙蘿。客衣塵土終須換，好與湖邊長芰荷。

### 陸廣曉發

初日曛曛似曉霞，雨痕新霽渡頭沙。溪深幾曲雲藏峽，樹老千年雪作花。  
白鳥去邊回驛路，青崖缺處見人家。遍行奇勝才經此，江上天勞羨九華。

### 雪夜

天涯久客歲侵尋，茆屋新開楓樹林。漸慣省言因病齒，屢經多難解安心。  
猶憐未繫蒼生望，且得閒為白石吟。乘興最堪風雪夜，小舟何日返山陰？

### 元夕二首

故園今夕是元宵，獨向蠻村坐寂寥。賴有遺經堪作伴，喜無車馬過相邀。  
春還草閣梅先動，月滿虛庭雪未消。堂上花燈諸弟集，重闈應念一身遙。  
去年今日臥燕臺，銅鼓中宵隱地雷。月傍苑樓燈彩淡，風傳閣道馬蹄回。  
炎荒萬裏頻回首，羌笛三更謾自哀。尚憶先朝多樂事，孝皇曾為兩宮開。

### 家僮作紙燈

寥落荒村燈事賒，蠻奴試巧剪春紗。花枝綽約含輕霧，月色玲瓏映綺霞。  
取辦不徒酬令節，賞心兼是惜年華，如何京國王侯第，一盞中人產十家！

### 白雲堂

白雲僧舍市橋東，別院迴廊小徑通。歲古簷松存獨幹，春還庭竹發新叢。  
晴窗暗映群峰雪，清梵長飄高閣風。遷客從來甘寂寞，青鞋時過月明中。

### 來仙洞

古洞春寒客到稀，綠苔荒徑草霏霏。書懸絕壁留僧偈，花發層蘿繡佛衣。

壺榼遠從童冠集，杖藜隨處宦情微。石門遙鎖陽明鶴，應笑山人久不歸。

#### 木閣道中雪

瘦馬支離緣絕壁，連峰窅窅人層雲。山村樹暝驚鴉陣，澗道雪深逢鹿群。  
凍合衡茅炊火斷，望迷孤戍暮笳聞。正思講習諸賢在，絳蠟清醅坐夜分。

#### 元夕雪用蘇韻二首

林間暮雪定歸鴉，山外鈴聲報使車。玉盞春光傳柏葉，夜堂銀燭亂簷花。  
蕭條音信愁邊雁，迢遞關河夢裡家。何日扁舟還舊隱，一蓑江上把魚叉。  
寒威入夜益廉纖，酒甕爐床亦戒嚴。久客漸憐衣有結，蠻居長嘆食無鹽。  
飢豺正爾群當路，凍雀從渠自宿簷。陰極陽回知不遠，蘭芽行見發春尖。

#### 曉霽用前韻書懷二首

雙闕鐘聲起萬鴉，禁城月色滿朝車。竟誰詩詠東曹檜？正憶梅開西寺花。  
此日天涯傷逐客，何年江上卻還家？曾無一字堪驅使，謾有虛名擬八叉。  
澗草岩花欲鬥纖，溪風林雪故爭嚴。連歧盡說還宜麥，煮海何曾見作鹽。  
路斷暫憐無過客，病餘兼喜曝晴簷。謫居亦自多清絕，門外群峰玉筍尖。

#### 次韻陸僉憲元日喜晴

城裡夕陽城外雪，相將十裏異陰晴。也知造物曾何意？底是人心苦未平！  
柏府樓台銜倒景，茆茨松竹瀉寒聲。布衾莫謾愁僵臥，積素還多達曙明。

#### 元夕木閣山火

荒村燈夕偶逢晴，野燒峰頭處處明。內苑但知鼇作嶺，九門空說火為城。  
天應為我開奇觀，地有茲山不世情。卻恐炎威被松柏，休教玉石遂同隳！

#### 夜宿汪氏園

小閣藏身一斗方，夜深虛白自生光。梁間來下徐生榻，座上慚無荀令香。  
驛樹雨聲翻屋瓦，龍池月色浸書床。他年貴竹傳異事，應說陽明舊草堂。

#### 春行

冬盡西歸滿山雪，春初復來花滿山。白鷗亂浴清溪上，黃鳥雙飛綠樹間。  
物色變遷隨轉眼，人生豈得長朱顏！好將吾道從吾黨，歸把漁竿東海灣。

#### 村南

花事紛紛春欲酣，杖藜隨步過村南。田翁開野教新犢，溪女分流浴種蠶。  
稚犬吠人依密槿，閒晷照影立晴潭。偶逢江客傳鄉信，歸臥楓堂夢石龕。

### 山途二首

上山見日下山陰，陰欲開時日欲沈。晚景無多傷遠道，朝陽莫更沮雲岑。  
人歸暝市分漁火，客舍空林依暮禽。世事驗來還自領，古人先已得吾心。  
南北驅馳任板輿，謫鄉何地是安居？家家細雨殘燈後，處處荒原野燒餘。  
江樹欲迷遊子望，朔雲長斷故人書。茂陵多病終蕭散，何事相如賦子虛？

### 白雲

白雲冉冉出晴峰，客路無心處處逢。已逐肩輿度青壁，還隨孤鶴下蒼松。  
此身愧爾長多繫，他日從龍謾託蹤。斷鷺殘鴉飛欲盡，故山回首意重重。

### 答劉美之見寄次韻

休疑遷客跡全貧，猶有沙鷗日見親。勛業已辭滄海夢，煙花多負故園春。  
百年長恐終無補，萬裏寧期尚得身。念我不勞傷鬢雪，知君亦欲拂衣塵。

### 書庭蕉

簷前蕉葉綠成林，長夏全無暑氣侵。但得雨聲連夜靜，何妨月色半床陰。  
新詩舊葉題將遍，老調疏桐恨傳深。莫笑鄭人談訟鹿，至今醒夢兩難尋。

### 送張憲長左遷滇南大參次韻

世味知公最飽諳，百年清德亦何慚！柏臺藩省官非左，江漢滇池道益南。  
絕域煙花憐我遠，今宵風月好誰談？交遊若問居夷事，為說山泉頗自堪。

### 南庵次韻二首

隔水樵漁亦幾家？緣岡石路入溪斜。松林晚映千峰雨，楓葉秋連萬樹霞。  
漸覺形骸逃物外，未妨遊樂在天涯。頻來不用勞僧榻，已僭汀鷗一席沙。  
斜日江波動客衣，水南深竹見岩扉。漁人收網舟初集，野老忘機坐未歸。  
漸覺雲間棲翼亂，愁看天北暮雲飛。年年歲晚長為客，閒殺西湖舊釣磯。

### 觀傀儡次韻

處處相逢是戲場，何須傀儡夜登堂？繁華過眼三更促，名利牽人一線長。  
稚子自應爭詫說，矮人亦復浪悲傷。本來面目還誰識？且向樽前學楚狂。

### 徐都憲同遊南庵次韻

岩寺藏春長不夏，江花映日豔於桃。山陰入戶川光暮，林影浮空暑氣高。  
樹老豈能知歲月，溪清真可鑒秋毫。但逢佳景須行樂，莫遣風霜著鬢毛。

### 即席次王文濟少參韻二首

搖落休教感客途，南來秋興未全孤。肝腸已自成金石，齒髮從渠變柳蒲。

傾倒酒杯金穀罰，逼真詞格輞川圖。謫鄉莫道貧消骨，猶有新詩了舊逋。  
此身未擬泣窮途，隨處翻飛野鶴孤。霜冷幾枝存晚菊，溪春兩度見新蒲。  
荊西寇盜紆籌策，湘北流移入畫圖。莫怪當筵倍淒切，誅求滿地促官逋。

#### 贈劉侍禦二首

相送溪橋未隔年，相逢又過小春天。憂時敢負君臣義？念別羞為兒女憐。  
道自升沈寧有定，心存氣節不無偏。知君已得虛舟意，隨處風波只宴然。

#### 夜寒

簷際重陰覆夜寒，石爐松火坐更殘。窮荒正訝鄉書絕，險路仍愁歸夢難，  
仙侶春風懷越嶠，釣船明月負嚴灘。未因謫宦傷憔悴，客鬢還羞鏡裡看。

#### 冬至

客床無寐聽潛雷，珍重初陽夜半回。天地未嘗生意息，冰霜不耐鬢毛催。  
春添衰線誰能補？歲晚心丹自動灰。料得重闌強健在，早看訊息報窗梅。

#### 春日花間偶集示門生

閒來聊與二三子，單夾初成行暮春。改課講題非我事，研幾悟道是何人？  
階前細草雨還碧，簷下小桃晴更新。坐起詠歌俱實學，毫釐須遣認教真。

#### 次韻送陸文順僉憲

貴陽東望楚山平，無奈天涯又送行。杯酒豫期傾蓋日，封書煩慰倚門情。  
心馳魏闕星辰迴，路繞鄉山草木榮。京國交遊零落盡，空將秋月寄猿聲。

#### 次韻陸僉憲病起見寄

一賦歸來不願餘，文園多病滯相如。籬邊竹筍青應滿，洞口桃花紅自舒。  
荷蕢有心還擊磬，周公無夢欲刪書。雲間憲伯能相慰，尺素長題問謫居。

#### 次韻胡少參見過

旋管小酌典春裘，佳客真慚竟日留。長怪嶺雲迷楚望，忽聞吳語破鄉愁。  
鏡湖自昔堪歸老，杞國何人獨抱憂！莫訝臨花倍惆悵，賞心原不在枝頭。

#### 雪中桃次韻

雪裡桃花強自春，蕭疏終覺損精神。卻慚幽竹節逾勁，始信寒梅骨自真。  
遭際本非甘冷淡，飄零須信季風塵。從來此事還希闊，莫怪臨軒賞更新。

#### 舟中除夕二首

扁舟除夕尚窮途。荊楚還憐俗未殊。處處送神懸楮馬，彩衣何日是庭趨？



遠客天涯又歲除，孤航隨處亦吾廬。也知世上風波滿，還戀山中木石居。  
事業無心從齒髮，親交多難絕音書，江湖未就新春計，夜半樵歌忽起予。

#### 過江門崖

三年謫宦沮蠻氛，天放扁舟下楚雲。歸信應先春鷹到，閒心期與白鷗群。  
晴溪欲轉新年色，蒼壁多遺古篆文。此地從來山水勝，它時回首憶江門。

#### 辰州虎溪龍興寺聞楊名父將到留韻壁間

杖藜一過虎溪頭，何處僧房是惠休？雲起峰頭沈閣影，林疏地底見江流。  
煙花日暖猶含雨，鷗鷺春閒欲滿洲。好景同來不同賞，詩篇還為故人留。

#### 武陵潮音閣懷元明

高閣憑虛臺十尋，捲簾疏雨動微吟。江天雲鳥自來去，楚澤風煙無古今。  
山色漸疑衡嶽近，花源欲問武陵深。新春尚沮東歸楫，落日誰堪話此心？

#### 閣中坐雨

臺下春雲及寺門，懶夫睡起正開軒。煙蕪漲野平堤綠，江雨隨風入夜喧。  
道意蕭疏慚歲月，歸心迢遞憶鄉園。年來身跡如漂梗，自笑迂癡欲手援。

#### 霽夜

雨霽僧堂鐘磬清，春溪月色特分明。沙邊宿鷺寒無影，洞口流雲夜有聲。  
靜後始知群動妄，閒來還覺道心驚。問津久已慚沮溺，歸向東皋學耦耕。

#### 僧齋

盡日僧齋不厭閑，獨餘春睡得相關。簷前水漲遂無地，江外雲晴忽有山。  
遠客趁墟招渡急，舟人曬網得魚還。也知世事終無補，亦復心存出處間。

#### 德山寺次壁間韻

乘興看山薄暮來，山僧迎客寺門開。雨昏碧草春申墓，雲捲青峰善卷臺。  
性愛煙霞終是僻，詩留名姓不須猜。岩根老衲成灰色，枯坐何年解結胎？

#### 沅江晚泊二首

去時煙雨沅江暮。此日沅江暮雨歸。水漫遠沙村市改，泊依舊店主人非。  
草深廨宇無官住，花落僧房有鳥啼。處處春光蕭索甚，正思荊棘掩岩扉。  
春來客思獨蕭騷，處處東田沒野蒿。雷雨滿江喧日夜，扁舟經月住風濤。  
流民失業乘時橫，原獸爭群薄暮號。卻憶鹿門棲隱地，杖藜壺榼餉東臯。

#### 夜泊江思湖憶元明

扁舟泊近漁家晚，茅屋深環柳港清。雷雨驟開江霧散，星河不動暮川平。  
夢回客枕人千里，月上春堤夜四更。欲寄愁心無過雁，披衣坐聽野雞鳴。

#### 睡起寫懷

江日熙熙春睡醒，江雲飛盡楚山青。閒觀物態皆生意，靜悟天機入窅冥。  
道在險夷隨地樂，心忘魚鳥自流形。未須更覓羲唐事，一曲滄浪擊壤聽。

#### 三山晚眺

南望長沙杳靄中，鵝羊只在暮雲東。天高雙櫓哀明月，江闊千帆舞逆風。  
花暗漸驚春事晚，水流應與客愁窮，北飛亦有衡陽雁，上苑封書未易通。

#### 鵝羊山

福地相傳楚水阿，三年春色兩經過。羊亡但有初平石，書罷惟籠道士鵝。  
禮門壇空松影靜，步虛臺迴月明多。岩房一宿猶緣薄，遙憶開雲住薜蘿。

#### 泗州寺

淶水西頭泗洲寺，經過轉眼又三年。老僧熟認直呼姓，笑我清臞只似前。  
每有客來看宿處，詩留佛壁作燈傳。開軒掃榻還相慰，慚愧維摩世外緣。

#### 再經武雲觀書林玉璣道士壁

碧山道士曾相約，歸路還來宿武雲。月滿仙臺依鶴侶，書留蒼壁看鵝群。  
春岩多雨林芳淡，暗水穿花石溜分。奔走連年家尚遠，空餘魂夢到柴門。

#### 再過濂溪祠用前韻

曾向圖書識面真，半生長自愧儒巾，斯文久已無先覺，聖世今應有逸民。  
一自支離乖學術，競將雕刻費精神。瞻依多少高山意，水漫蓮池長綠蘋。

#### 西湖醉中漫書二首

十年塵海勞魂夢，此日重來眼倍清。好景恨無蘇老筆，乞歸徒有賀公情。  
白鳧飛處青林晚，翠壁明邊返照晴。爛醉湖雲宿湖寺，不知山月墮江城。  
掩映紅妝莫謾猜，隔林知是藕花開。共君醉臥不須到，自有香風拂面來。

#### 題四老圍棋圖

世外煙霞亦許時，至今風致後人思。卻懷劉項當年事，不及山中一著棋。

#### 書梅竹小畫

寒倚春霄蒼玉杖，九華峰頂獨歸來。柯家草亭深雲裡，卻有梅花傍竹開。

### 袁州府宜春臺四絕

宜春臺上還春望，山水南來眼未嘗。卻笑韓公亦多事，更從南浦羨滕王。  
臺名何事只宜春？山色無時不可人。不用煙花費妝點，儘教刊落盡嶙峋。  
持修江藻拜祠前，正是春風欲暮天。童冠盡多歸詠興，城南兼說有溫泉。  
古廟香燈幾許年？增修還費大官錢。至今楚地多風雨，猶道山神駕鐵船。

### 遊嶽麓書事

醴陵西來涉湘水，信宿江城沮風雨。不獨病齒畏風濕，泥潦侵途絕行旅。  
人言嶽麓最形勝，隔水溟濛隱雲霧；趙侯需晴邀我遊，故人徐陳各傳語；  
周生好事屢來速，森森雨腳何由住！曉來陰翳稍披拂，便攜周生涉江去。

戒令休遣府中知，徒爾勞人更妨務。橘洲僧寺浮江流，鳴鐘出延立沙際。  
停橈一至答其情，三洲連綿亦佳處。行雲散漫浮日色，是時峰巒益開霽。  
亂流盪漿濟倏忽，繫楫江邊老檀樹。岸行裏許入麓口，周生道予勤指顧。

柳溪梅堤存彷彿，道林林壑獨如故。赤沙想像虛田中，西嶼傾頽今塚墓。  
道鄉荒趾留突兀，赫曦遠望石如鼓。殿堂釋菜禮從宜，下拜朱張息遊地。  
鑿石開山面勢改，雙峰闕闕見江渚；聞是吳君所規畫，此舉良是反遭忌。

九仞誰虧一簣功，嘆息遺基獨延佇！浮屠觀閣摩青霄，盤據名區遍寰宇；  
其徒素為儒所擯，以此方之反多愧。愛禮思存告朔羊，況此實作匪文具。  
人雲趙侯意頗深，隱忍調停旋修舉；昨來風雨破棟脊，方遣巧人補殘敝。

予聞此語心稍慰，野人蔬蕨亦羅置；欣然一酌才舉杯，津夫走報郡侯至。  
此行隱跡何由聞？遣騎候訪自吾寓；潛來鄙意正為此，倉卒行庖益勞費。  
整冠出訝見兩蓋，乃知王君亦同禦。餽羞層疊絲竹繁，避席興辭懇莫拒。

多儀劣薄非所承，樂闋觴周日將暮。黃堂吏散君請先，病夫霑醉須少憩。  
入舟暝色漸微茫，卻喜順流還易渡。嚴城燈火人已稀，小巷曲折忘歸路。  
仙宮酣倦成熟寐，曉聞簷聲復如注。昨遊偶遂實天假，信知行樂皆有數。  
涉躡差償夙好心，尚有名山敢多慕！齒角盈虧分則然，行李雖淹吾不惡。

### 化城寺六首

化城高住萬山深，樓閣憑空上界侵。天外清秋度明月，人間微雨結浮陰。  
鉢龍降處雲生座，岩虎歸時風滿林。最愛山僧能好事，夜堂燈火伴孤吟。  
雲裡軒窗半上鉤，望中千里見江流。高林日出三更曉，幽谷風多六月秋。

仙骨自憐何日化，塵緣翻覺此生浮。夜深忽起蓬萊興，飛上青天十二樓。

雲端鼓角落星斗，松頂袈裟散雨花。一百六峰開碧漢，八十四梯踏紫霞。  
山空仙骨葬金槲，春暖石芝抽玉芽。獨揮談塵拂煙霧，一笑天地真無涯。

化城天上寺，石磴八星躔。雲外開丹井，峰頭耕石田。  
月明猿聽偈，風靜鶴參禪。今日揩雙眼，幽懷二十年。  
僧屋煙霏外，山深絕世譚。茶分龍井水，飯帶石田砂。  
香細雲嵐雜，窗高峰影遮。林棲無一事，終日弄丹霞。  
突兀開穹閣，氤氳散曉鐘。飯遺黃稻粒，花發五釵松。  
金骨藏靈塔，神光照遠峰，微茫竟何是？老衲話遺蹤。

#### 又四絕句

翠壁看無厭，山池坐益清。深林落輕葉，不道是秋聲。  
怪石有千窟，老松多半枝。清風灑岩洞，是我再來時。  
人間酷暑避不得，清風都在深山中。池邊一坐即三日，忽見岩頭碧樹紅。  
兩到浮峰興轉劇，醉眠三日不知還。眼前風景色色異，惟有人聲似世間。

#### 山中立秋日偶書

風吹蟬聲亂，林臥驚新秋。山池靜澄碧，暑氣亦已收。青峰出白雲，突兀成瓊樓。  
袒裼坐溪石，對之心悠悠。倏忽無定態，變化不可求。浩然發長嘯，忽起雙白鷗。

#### 夜雨山翁家偶書

山空秋夜靜，月明松檜涼。沿溪步月色，溪影搖空蒼。  
山翁隔水語，酒熟呼我嘗。褰衣涉溪去，笑引開竹房。  
謙言值暮夜，盤餐百無將。露華明橘柚，摘獻冰盤香。  
洗盞對酬酢，浩歌入蒼茫。醉拂岩石臥，言歸遂相忘。

#### 九華山下柯秀才家

蒼峰抱層嶂，翠瀑繞雙溪。下有幽人宅，蘿深客到迷。

#### 夜宿無相寺

春宵臥無相，月照五溪花。掬水洗雙眼，披雲看九華。  
岩頭金佛國，樹杪謫仙家。彷彿聞笙鶴，青天落絳霞。

#### 無相寺三首

老僧岩下屋，繞屋皆松竹。朝聞春鳥啼，夜伴岩虎宿。坐望九華碧，浮雲生曉寒。  
山靈應祕惜，不許俗人看。靜夜聞林雨，山靈似欲留。只愁梯石滑，不得到峰頭。

### 李白祠二首

千古人豪去，空山尚有祠。竹深荒舊徑，蘚合失殘碑。  
雲雨羅文藻，溪泉繫夢思。老僧殊未解，猶自索題詩。  
謫仙棲隱地，千載尚高風。雲散九峰雨，岩飛百丈虹。  
寺僧傳舊事，詞客弔遺跡。回首蒼茫外，青山感慨中。

### 雙峰

凌崖望雙峰，蒼茫竟何在？載拜西北風，為我掃浮靄。

### 蓮花峰

夜靜涼颯發，輕雲散碧空。玉鉤掛新月，露出青芙蓉。

### 列仙峰

靈峭九萬丈，參差生曉寒。仙人招我去，揮手青雲端。

### 雲門峰

雲門出孤月，秋色坐蒼濤。夜久群籟絕，獨照宮錦袍。

### 芙蓉閣二首

青山意不盡，還向月中看。明日歸城市，風塵又馬鞍。  
岩下雲萬重，洞口桃千樹。終歲無人來，惟許山僧住。

### 登泰山五首

一

曉登泰山道，行行入煙霏。陽光散岩壑，秋容淡相輝。  
雲梯掛青壁，仰見蛛絲微。長風吹海色，飄遙送天衣。  
峰頂動笙樂，青童兩相依。振衣將往從，凌雲忽高飛。  
揮手若相待，丹霞閃餘暉。凡軀無健羽，悵望未能歸。

二

天門何崔嵬，下見青雲浮。泱泱絕人世，迴豁高天秋。  
暝色從地起，夜宿天上樓。天雞鳴半夜，日出東海頭。  
隱約蓬壺樹，縹緲扶桑洲。浩歌落青冥，遺響入滄流。  
唐虞變楚漢，滅沒如風漚。藐矣鶴山仙，秦皇豈堪求？  
金砂費日月，頽顏竟難留。吾意在龐古，冷然馭涼颯。  
相期廣成子，太虛顯遨遊。枯槁向岩穀，黃綺不足儔。

### 三

石峰互攢簇，掩映青芙蓉。高臺倚巉削，傾側臨崆峒。  
失足墮煙霧，碎骨顛崖中。下愚竟難曉，摧折紛相從。  
吾方坐日觀，披雲笑天風。赤水問軒後，蒼梧叫重瞳。  
隱隱落天語，閭闔開玲瓏。去去勿復道，濁世將焉窮！

### 四

塵網苦羈縻，富貴真露草！不如騎白鹿，東遊入蓬島。  
朝登太山望，洪濤隔縹緲；陽輝出海雲，來作天門曉。  
遙見碧霞君，翩翩起員嶠。玉女紫鸞笙，雙吹入晴昊。  
舉首望不及，下拜風浩浩。擲我玉虛篇，讀之殊未了；  
傍有長眉翁，一一能指道。從此煉金砂，人間跡如掃。

### 五

我才不救時，匡扶志空大。置我有無間，緩急非所賴。  
孤坐萬峰顛，嗒然遺下塊，已矣復何求？至精諒斯在。  
淡泊非虛杳，灑脫無芥蒂。世人聞餘言，不笑即籲怪。  
吾亦不強語，惟復笑相待。魯叟不可作，此意聊自快。

### 憶龍泉山

我愛龍泉寺，寺僧頗疏野。盡日坐井欄，有時臥松下。  
一夕別山雲，三年走車馬。愧殺岩下泉，朝夕自清瀉。

### 憶諸弟

一別龍山雲，時夢龍山雨。覺來枕簟涼，諸弟在何許？  
終年走風塵，何似山中住。百歲如轉蓬，拂衣從此去。

### 寄舅

老舅近何如？心性老不改。世故惱情懷，光陰不相待。  
借問同輩中，鄉鄰幾人在？從今且為樂，舊事無勞悔！

### 送人東歸

五泄佳山水，平生思一遊。送子東歸省，菁鱸況復秋。  
幽探須及壯，世事苦悠悠。來歲春風裡，長安憶故丘。

### 寄西湖友

予有西湖夢，西湖亦夢予。三年成闊別，近事竟何如？  
況有諸賢在，他時終菡廬。但恐吾歸日，君還軒冕拘。

### 贈陽伯

陽伯即伯陽，伯陽竟安在？大道即人心，萬古未嘗改。  
長生在求仁，金丹非外待。繆矣三十年，於今吾始悔！

### 故山

鑿水終年碧，雲山盡日閒。故山不可到，幽夢每相關。  
霧豹言長隱，雲龍欲共攀。緣知丹壑意，未勝紫宸班。

### 憶鑑湖友

長見人來說，扁舟每獨遊。春風梅市晚，月色鑑湖秋。  
空有煙霞好，猶為塵世留。自今當勇往，先與報江鷗。

### 不寐

天寒歲雲暮，冰雪關河迴。幽室魍魎生，不寐知夜永。  
驚風起林木，驟若波浪洶。我心良匪石，詎為戚欣動！  
滔滔眼前事，逝者去相踵。崖窮猶可陟，水深猶可泳。  
焉知非日月，胡為亂予衷？深谷自逶迤，煙霞日悠永。  
匡時在賢達，歸哉盍耕壟！

### 讀易

囚居亦何事？省愆懼安飽。瞑坐玩義易，洗心見微奧。  
乃知先天翁，畫畫有至教。包蒙戒為寇，童牝事宜早；  
蹇蹇匪為節，虩虩未違道。遁四獲我心，蠱上庸自保。  
俯仰天地間，觸目俱浩浩。簞瓢有餘樂，此意良匪矯。  
幽哉陽明麓，可以忘吾老。

### 見月

屋罅見明月，還見地上霜。客子夜中起，徬徨涕沾裳。  
匪為嚴霜苦，悲此明月光。月光如流水，徘徊照高堂。  
胡為此幽室，奄忽逾飛揚？逝者不可及，來者猶可望。  
盈虛有天運，嘆息何能忘！

### 屋罅月

幽室不知年，夜長晝苦短。但見屋罅月，清光自虧滿。  
佳人宴清夜，繁絲激哀管；朱閣出浮雲，高歌正淒婉。  
寧知幽室婦，中夜獨愁嘆！良人事遊俠，經歲去不返。  
來歸在何時？年華忽將晚。蕭條念宗祀，淚下長如霰。

## 別友獄中

居常念朋舊，簿領成闊絕，嗟我二三友，胡然此簪盍！  
纍纍囹圄間，講誦未能輟。桎梏敢忘罪？至道良足悅。  
所恨精誠眇，尚口徒自蹶。天王本明聖，旋已但中熱。  
行藏未可期，明當與君別。願言無詭隨，努力從前哲！  
陽明子之南也其友湛元明歌九章

以贈崔子鐘和之以五詩於是陽明子作八詠以答之

一

君莫歌九章，歌以傷我心。微言破寥寂，重以離別吟。  
別離悲尚淺，言微感逾深。瓦缶易諧俗，誰辯黃鐘音？

二

君莫歌五詩，歌之增離憂。豈無良朋侶？洵樂相遨遊。  
譬彼桃與李，不為倉困謀。君莫忘五詩，忘之我焉求？

三

洙泗流浸微，伊洛僅如線；後來三四公，瑕瑜未相掩。  
嗟予不量力，跋蹙期致遠，屢興還屢僕，惴息幾不免。  
道逢同心人，秉節倡予敢；力爭毫釐間，萬裏或可勉。風波忽相失，言之淚徒泫。

四

此心還此理，寧論己與人！千古一噓吸，誰為嘆離群？浩浩天地內，何物非同春！  
相思輒奮勵，無為俗所分。但使心無間，萬裏如相親；不見宴遊交，徵逐胥以淪？

五

器道不可離，二之即非性。孔聖欲無言，下學從泛應。君子勤小物，蘊蓄乃成行。  
我誦窮索篇，於子既聞命；如何園中士，空谷以為靜？

六

靜虛非虛寂，中有未發中。中有亦何有？天之即成空。  
無欲見真體，忘助皆非功。至哉玄化機，非子孰與窮！

七

憶與美人別，贈我青瑯函。受之不敢發，焚香始開緘；  
諷誦意彌遠，期我濂洛間。道遠恐莫致，庶幾終不慚。



八

憶與美人別，惠我雲錦裳。錦裳不足貴，遺我冰雪腸。  
寸腸亦何遺？誓言終不渝。珍重美人意，深秋以為期。

### 南遊三首

南遊何迢迢，蒼山亦南馳。如何衡陽雁，不見燕臺書？  
莫歌豐浦曲，莫弔湘君祠。蒼梧煙雨絕，從誰問九疑？  
九疑不可問，羅浮如可攀。遙拜羅浮雲，奠以雙瓊環。  
渺渺洞庭波，東逝何時還？生人不努力，草木同衰殘！  
洞庭何渺茫，衡岳何崔嵬！風飄回雁雪，美人歸未歸？  
我有紫瑜珮，留掛芙蓉臺。下有蛟龍峽，往往興雲雷。

### 憶昔答喬白岩因寄儲柴墟三首

#### 其一

憶昔與君約，玩易探玄微。君行赴西嶽，經年始來歸。  
方將事窮索，忽復當遠辭。相去萬裏餘，  
後會安可期？問我長生訣，惑也吾誰欺！盈虧訊息間，  
至哉天地機。聖狂天淵隔，失得分毫釐。

#### 其二

毫釐何所辯？惟在公與私。公私何所辯？天動與人為。  
遺體豈不貴？踐形乃無虧。願君崇德性，問學刊支離。  
無為氣所役，毋為物所疑；恬淡自無欲，精專絕交馳。  
博弈亦何事，好之甘若飴？吟詠有性情，喪志非所宜。  
非君愛忠告，斯語容見嗤；試問柴墟子，吾言亦何如？

#### 其三

柴墟吾所愛，春陽溢鬢眉；白岩吾所愛，慎默長如愚。  
二君廊廟器，予亦山泉姿。度量較齒德，長者皆吾師。

置我五人末，庶亦忘崇卑。迢迢萬裏別，心事兩不疑。北風送南雁，慰我長相思。

一日懷抑之也抑之之贈既嘗答以三詩意若有歉焉是以賦也

#### 其一

一日復一日，去子日以遠。惠我金石言，沉鬱未能展。人生各有際，道誼尤所眷。  
嘗嗤兒女悲，憂來仍不免。緬懷滄洲期，聊以慰遲晚。

#### 其二

遲晚不足嘆，人命各有常。相去忽萬裏，河山鬱蒼蒼。  
中夜不能寐，起視江月光。中情良自抑，美人難自忘。

### 其三

美人隔江水，彷彿若可睹。風吹蒹葭雪，飄蕩知何處？  
美人有瑤瑟，清奏含太古。高樓明月夜，惆悵為誰鼓？

夢與抑之昆季語湛崔皆在焉覺而有感因記以詩三首

### 其一

夢與故人語，語我以相思。才為旬日別，宛若三秋期。  
令弟坐我側，屈指如有為；須臾湛君至，崔子行相隨。

肴醕旋羅列，語笑如平時。縱言及微奧，會意忘其辭。覺來復何有？起坐空嗟咨！

### 其二

起坐憶所夢，默溯猶歷歷；初談自有形，繼論人無極。  
無極生往來，往來萬化出；萬化無停機，往來何時息！  
來者胡為信？往者胡為屈？微哉屈信間，子午當其屈。  
非子盡精微，此理誰與測？何當衡廬間，相攜玩義易。

### 其三

衡廬曾有約，相攜尚無時。去事多翻覆，來蹤豈前知？斜月滿虛牖，  
樹影何參差；林風正蕭瑟，驚鵲無寧枝。邈彼二三子，怒焉勞我思。

過分宜望鈴岡廟

共傳峰頂樹，古廟有靈神，楚俗多尊鬼，巫言解惑人。  
望禋存舊典，捍禦及斯民。世事渾如此，題詩感慨新！

雜詩三首

### 其一

危棧斷我前，猛虎尾我後，倒崖落我左，絕壑臨我右。我足復荊榛，  
雨雪更紛驟，邈然思古人，無悶聊自有。無悶雖足珍，警惕忘爾守。  
君觀真宰意，匪薄亦良厚。

### 其二

青山清我目，流水靜我耳；琴瑟在我禦，經書滿我幾。措足踐坦道，  
悅心有妙理，頑冥非所懲，賢達何靡靡！乾乾懷往訓，敢忘惜分晷？  
悠哉天地內，不知老將至。

### 其三

羊腸亦坦道，太虛何陰晴？燈窗玩古易，欣然獲我情。  
起舞還再拜，聖訓垂明明；拜舞詎逾節？頓忘樂所形。  
斂衽復端坐，玄思窺沉冥。寒根固生意；息灰抱陽精。  
衝漠際無極，列宿羅青冥。夜深嚮晦息，始聞風雨聲。

### 長沙答周生

旅倦憩江觀，病齒廢談誦。之子特相求，禮殫意彌重。  
自言絕學餘，有志莫與共；手持一編書，披歷見肝衷；  
近希小範蹤，遠為賈生慟；兵符及射藝，方技靡不綜。  
我方懲創後，見之色亦動。子誠仁者心，所言亦屢中；  
願子且求志，蘊蓄事涵泳。孔聖固惶惶，與點樂歸詠；  
回也王佐才，閉戶避鄰閭。知子信美才，大構中樑棟；

未當匠石求，滋植務培壅。愧子勤綫意，何以相規諷？  
養心在寡慾，操存舍即縱。岳麓何森森，遺址自南宋；  
江山足遊息，賢跡尚堪踵。何當謝病來，士氣多沈勇。

### 陟湘於邁嶽麓是尊仰止先哲因懷友生麗澤興感伐木寄言二首 其一

客行長沙道，山川鬱稠繆。西探指岳麓，凌晨渡湘流；  
逾岡復陟巘，弔古還尋幽。林壑有餘采，昔賢此藏修；  
我來實仰止，匪伊事盤遊。衡雲閒曉望，洞野浮春洲。  
懷我二三友，伐木增離憂。何當此來聚？道誼日相求。

### 其二

林間憩白石，好風亦時來。春陽熙百物，欣然得予懷。  
緬思兩夫子，此地得徘徊。當年靡童冠，曠代登堂階。  
高情詎今昔，物色遺吾儕。顧謂二三子，取瑟為我諧。  
我彈爾為歌，爾舞我與偕。吾道有至樂，富貴真浮埃！  
若時乘大化，勿愧點與回。陟岡採松柏，將以遺所思；  
勿採松柏枝，兩賢昔所依。緣峰踐臺石，將以望所期；

勿踐臺上石，兩賢昔所躋。兩賢去邈矣，我友何相違？  
吾斯未能信，役役空爾疲。胡不此簪盃，麗澤相遨嬉？  
渴飲松下泉，飢餐石上芝。偃仰絕餘念，遷客難久稽。  
洞庭春浪闊，浮雲隔九疑。江洲滿芳草，日極令人悲。  
已矣從此去，奚必茲山為！戀系乃從欲，安土惟隨時。晚聞冀有得，此外吾何知！

### 次韻答趙太守王推官

詰朝事虔謁，玄居宿齋沐。積霖喜新霽，風日散清燠。  
蘭橈渡芳渚，半涉見水陸；溪山儼新宇，雷雨荒大麓。  
皇皇絃誦區，斯文昔炳鬱；興廢尚屯疑，使我懷俳懊。  
近聞牧守賢，經營亟乘屋。方舟為予來，飛蓋遙肅肅。  
花絮媚晚筵，韶景正柔淑。浴沂諒同情，及茲授春服。  
令德倡高詞，混珠愧魚目！努力崇修名，迂疏自岩穀。

### 天心湖阻泊既濟書事

掛席下長沙，瞬息百餘裏。舟人共揚眉，予獨憂其駛。  
日暮入沅江，抵石舟果圯。補敝詰朝發，衝風遂齟齬。  
暝泊後江湖，蕭條旁罾壘。月黑波濤驚，蛟鼉互睥睨。  
翼午風益厲，狼狽收斷汜。天心數裏間，三日但遙指。  
甚雨迅雷電，作勢殊未已。溟溟雲霧中，四望渺涯淚。  
篙槳不得施，丁夫盡嗟噫。淋瀝念同胞，吾寧忍暴使？

饘粥且傾橐，苦甘吾與爾。眾意在必濟，糧絕亦均死。  
憑陵向高浪，吾亦詎容止。虎怒安可撓？志同稍足倚；  
桃令並岸行，試涉湖濱沚。收舵幸無事，風雨亦浸弛。  
逡巡緣沚湄，迤邐就風勢。新漲翼回湍，倏忽逝如矢。  
夜入武陽江，漁村穩堪艤。糴市謀晚炊，且為眾人喜。  
江醪信灘濁，聊復蕩胸滓。濟險在需時，徼幸豈常理？  
爾輩勿輕生，偶然非可恃！

### 去婦嘆五首

楚人有間於新娶而去其婦者。其婦無所歸，去之山間獨居，  
懷綉不忘，終無他適。予聞其事而悲之，為作去去婦嘆。  
委身奉箕帚，中道成捐棄。蒼蠅間白璧，君心亦何愆！  
獨嗟貧家女，素質難為妍。命薄良自喟，敢忘君子賢？  
春華不再豔，頽魄不重圓。新歡莫終恃，令儀慎周還。  
依違出門去，欲行復遲遲。鄰嫗盡出別，強語含辛悲。

陋質容有繆，放逐理則宜；姑老籍相慰，缺乏多所資。妾行長已矣，會面當無時！

妾命如草芥，君身比瑯玕。奈何以妾故，廢倉懷憤冤？  
無為傷姑意，燕爾且為歡；中廚存宿旨，為姑備早餐。  
畜育意千緒，倉卒徒悲酸。伊邇望門屏，盍從新人言。  
夫意已如此，妾還當誰顏！去矣勿復道，已去還躊躕。

雞鳴尚聞響，犬戀猶相隨。感此摧肝肺，淚下不可揮。  
岡回行漸遠，日落群鳥飛。群鳥各有托，孤妾去何之？

空穀多淒風，樹木何蕭森！浣衣澗冰合，採苓山雪深。離居寄岩穴，憂思托鳴琴。

朝彈別鶴操，暮彈孤鴻吟。彈苦思彌切，嘖岢隔雲岑。君聰甚明哲，何因聞此音？

初至龍場無所止結草庵居之

草庵不及肩，旅倦體方適。開棘自成籬，土階漫無級；  
迎風亦蕭疏，漏雨易補緝。靈瀨響朝湍，深林凝暮色。  
群僚環聚訊，語龐意頗質。鹿豕且同遊，茲類猶人屬。  
汗樽映瓦豆，盡醉不知夕。緬懷黃唐化，略稱茅茨跡。

始得東洞遂改為陽明小洞天三首

古洞闕荒僻，虛設疑相待。披萊歷風磴，移居快幽壘。  
營炊就岩竇，放榻依石壘。穹室旋薰塞，夷坎仍灑掃。  
卷帙漫堆列，樽壺動光彩。夷居信何陋，恬淡意方在。  
豈不桑梓懷？素位聊無悔。童僕自相語，洞居頗不惡。  
人力免結構，天巧謝雕鑿。清泉傍廚落，翠霧還成幕。  
我輩日嬉偃，主人自愉樂。雖無柴戟榮，且遠塵囂聒。

但恐霜雪凝，雲深衣絮薄。我聞莞爾笑，周慮愧爾言。  
上古處巢窟，抔飲皆汗樽。互極陽內伏，  
古穴多冬暄。豹隱文始澤，龍蟄身乃存。豈無數盡懷，  
輕裘吾不溫。邈矣簞瓢子，此心期與論。

謫居絕糧請學於農將田南山永言寄懷

謫居屢在陳，從者有愠見。山荒聊可田，錢鎛還易辦。  
夷俗多火耕，仿習亦頗便。及茲春未深，  
數畝猶足佃。豈徒實口腹？且以理荒宴。遺穗及烏雀，  
貧寡發餘羨。出耒在明晨，山寒易霜霰。

觀稼

下田既宜稌，高田亦宜稷。種蔬須土疏，種預須土濕。  
寒多不實秀，暑多有螟螣。去草不厭頻，耘禾不厭密。  
物理既可玩，化機還默識；即是參贊功，毋為輕稼穡！

採蕨

採蕨西山下，扳援陟崔嵬。遊子望鄉國，淚下心如摧。浮雲塞長空，潁陽不可回。南歸斷舟楫，北望多風埃。已矣供子職，勿更貽親哀！

#### 猗猗

猗猗澗邊竹，青青岩畔松。直幹歷冰雪，密葉留清風。自期永相托，雲壑無違蹤。如何兩分植，憔悴嘆西東。人事多翻覆，有如道上蓬。惟應歲寒意，隨處還當同。

#### 南溟

南溟有瑞鳥，東海有靈禽；飛遊集上苑，結侶珍樹林；顧言飾羽儀，共舞簫韶音。風雲忽中變，一失難相尋。瑞鳥既遭縻，靈禽投荒岑；天衢雨雪積，江漢虞羅侵。哀哀鳴索侶，病翼飛未任。群鳥亦千百，誰當會其心？南嶽有竹實，丹溜青松陰；何時共棲息？永托雲泉深。

#### 溪水

溪石何落落，溪水何冷冷。坐石弄溪水，欣然濯我纓。溪水清見底，照我白髮生。年華若流水，一去無回停。悠悠百年內，吾道終何成！

#### 龍岡新構

謫居聊假息，荒穢亦須治。鑿巘薙林條，小構自成趣。開窗入遠峰，架扉出深樹。墟寨俯逶迤，竹木互蒙翳。畦蔬稍溉鋤，花藥頗雜蒔。宴適豈專予，來者得同憩。輪奐非致美，毋令易傾敝。營茅乘田隙，洽旬始苟完。初心待風雨，落成還美觀。鋤荒既開徑，拓樊亦理園。低簷避松偃，蔬土行竹根。勿剪牆下棘，束列因可藩；奠擷林間蘿，蒙籠覆雲軒。素缺農圃學，因茲得深論。毋為輕鄙事，吾道固斯存。

#### 諸生來

簡滯動罹咎，廢幽得倖免。夷居雖異俗，野樸意所眷。思親獨疚心，疾憂庸自遣。門生頗群集，樽單亦時展。講習性所樂，記問復懷覩。林行或沿澗，洞遊還陟嶽。月榭坐鳴琴，雲窗臥披卷。澹泊生道真，曠達匪荒宴。豈必鹿門棲，自得乃高踐。

#### 西園

方園不盈畝，蔬卉頗成列。分溪免甕灌，補籬防豕蹄。蕪草稍焚薙，清雨夜來歇。濯濯新葉敷，熒熒夜花發。放鋤息重陰，舊書漫披閱。倦枕竹下石，醒望松間月。起來步閒謠，晚酌簷下設。盡醉即草鋪，忘與鄰翁別。

### 水濱洞

送遠憩岨穀，濯纓俯清流。沿溪涉危石，曲洞藏深幽。花靜馥常闕，溜暗光亦浮。平生泉石好，所遇成淹留。好鳥忽雙下，鱗魚亦群遊。坐久塵慮息，澹然與道謀。

### 山石

山石猶有理，山木猶有枝；人生非木石，別久寧無思！  
愁來步前庭，仰視行雲馳；行雲隨長風，飄飄去何之？  
行雲有時定，遊子無還期。高樑始歸燕，題鴉已先悲。  
有生豈不苦，逝者長若斯！已矣復何事？商山行採芝。

### 無寐二首

煙燈暖無寐，憂思坐長往。寒風振喬林，葉落聞窗響。起窺庭月光，山空遊罔象。懷人阻積雪，崖冰幾千丈。窮崖多雜樹，上與青冥連。穿雲下飛瀑，誰能識其源？但聞清猿嘯，時見皓鶴翻。中有避世士，冥寂棲其巔。翳予亦同調，路絕難攀緣。

### 諸生夜坐

謫居澹虛寂，眇然懷同遊。日入山氣夕，孤亭俯平疇。草際見數騎，取徑如相求；漸近識顏面，隔樹停鳴騶；投轡雁鷺進，攜盒各有羞；分席夜堂坐，絳蠟清樽浮；鳴琴復散帙，壺矢交觥籌。夜弄溪上月，曉陟林間丘。村翁或招飲，洞客偕探幽。講習有真樂，談笑無俗流。緬懷風沂興，千載相為謀。

### 艾草次胡少參韻

艾草莫艾蘭，蘭有芬芳姿。況生幽谷底，不礙君稻畦。艾之亦何益？徒令香氣衰。荊棘生滿道，出刺傷人肌；持刀忌觸手，睨視不敢揮。艾草須艾棘，勿為棘所欺。

### 鳳雛次韻答胡少參

鳳雛生高岩，風雨摧其翼。養痾深林中，百鳥驚辟易。虞人視為妖，舉網爭彈弋。此本王者瑞，惜哉誰能識！吾方哀其窮，胡忍復相亟？鷓鴣據叢林，驅鳥恣搏食。嗟爾獨何心？梟鳳如白黑。

### 鸚鵡和胡韻

鸚鵡生隴西，群飛恣鳴遊。何意虞羅及？充貢來中州；金條縻華屋，雲泉謝林丘。能言實階禍，吞聲亦何求！主人有隱寇，竊發聞其謀，感君惠養德，一語思所酬。懼君不見察，殺身反為尤。

### 諸生

人生多離別，佳會難再遇。如何百里來，三宿便辭去？  
有琴不肯彈，有酒不肯禦。遠陟見深情，寧予有弗顧？  
洞雲還自棲，溪月誰同步？不念南寺時，寒江雪將暮？  
不記西園日，桃花夾川路？相去條幾月，秋風落高樹。  
富貴猶塵沙，浮名亦飛絮。嗟我二三子，吾道有真趣。胡不攜書來，茆堂好同住！

### 遊來仙洞早發道中

霜風清木葉，秋意生蕭疏。衝星策曉騎，幽事將有徂。  
股蟲亂飛擲，道狹草露濡；傾暑物晨發，徵夫已先途。  
浙米石間溜，炊火岩中廬。煙峰上初日，林鳥相嚶呼。  
意欣物情適，戰勝懼色腴。行樂信宇宙，富貴非吾圖！

### 別友

幽尋意方結，奈此世累牽。凌晨驅馬別，持杯且為傳。相求苦非遠，山路多風煙。  
所貴明哲士，秉道非苟全。去矣崇令德，吾亦行歸田。

### 贈黃太守澍

歲宴鄉思切，客久親舊疏。臥痾閉空院，忽來故人車。  
入門辯眉宇，喜定還驚籲。遠行亦安適，符竹膺新除。  
荒郡號難理，況茲徵索餘！君才素通敏，窘劇宜有紓。  
蠻鄉雖瘴毒，逐客猶安居。經濟非復事，時還理殘書。  
山泉足遊憩，麋鹿能友予。澹然穹壤內，容膝皆吾廬。  
惟營垂白念，旦夕懷歸圖。君行勉三事，吾計終五湖。

### 寄友用韻

懷人坐沈夜，帷燈暖幽光。耿耿積煩緒，忽忽如有忘。  
玄景逝不處，朱炎化微涼。相彼谷中葛，重陰殞衰黃。  
感此遊客子，經年未還鄉。伊人不在目，絲竹徒滿堂，  
天深雁書杳，夢短關塞長。情好矢無數，願言覲終償。  
惠我金石編，徽音激宮商。馳輝不可即，式爾增予傷！馨香襲肝膂，聊用心中藏。

### 秋夜

樹暝棲翼喧，螢飛夜堂靜。遙穹出晴月，低簷入峰影。  
窅窈坐幽獨，怵爾抱深警。年徂道無聞，  
心違跡未屏。蕭瑟中林秋，雲凝松桂冷。山泉豈無適？  
離人懷故境。安得駕雲鴻，高飛越南景！



### 採薪二首

朝採山上荊，暮採谷中粟。深谷多淒風，霜露沾衣濕。  
採薪勿辭辛，昨來斷薪拾。晚歸陰壑底，抱甕還自汲。  
薪水良獨勞，不愧吾食力！倚擔青岩際，歷斧崖下石。  
持斧起環顧，長松百餘尺。徘徊不忍揮，俯略澗邊棘。  
同行笑吾餒，爾斧安用歷？快意豈不能？物材各有適。可以相天子，眾稚詎足識！

### 寄徐掌教

徐稚今安在？空樑榻久懸。北門傾蓋日，東魯校文年。  
歲月成超忽，風雲易變遷。新詩勞寄我，不愧鳥鳴篇。

### 淑浦山夜泊

淑浦山邊泊，雲間見驛樓。灘聲回遠樹，崖影落中流。  
柳放新年綠，人歸隔歲舟。客途時極目，天北暮陰愁。

### 有室七章

有室如虞，周之崇墉。室如穴處，無秋天冬！耿彼屋漏，天光入之。瞻彼日月，何嗟及之！

倏晦倏明，淒其以風。倏雨倏雪，當晝而蒙。夜何其矣，靡星靡粲。豈無白日？寤寐永嘆！

心之憂矣，匪家匪室。或其啟矣，殞予匪恤。氤氳其埃，日之光矣，淵淵其鼓，明既昌矣。

朝既式矣，日既夕矣。悠悠我思，曷其極矣！

全集字數：16,485 字